

Wo isch dä Kassier vo däre Turnerriege
Dä söll jetzt ufschtoh und nöd hocke bliibe.
Mir händ do im Dunkle muese umerutsche,
andri Verein holed eus ab mit dä Kutsche!
Wenn du dä Chlaus aus nöchshti Johr wotsch gseh,
muesch halt die Transportchoschte is Bütsche neh.

Au dä Vorschtand muess ich i däm Johr rüge
Tüend eu doch e mol in Arsch ine chlübe.
Dä Samichlaus wohnt im Wald, hinter dä Tanne
Er gseht nöd bis uf Wislig, zu dä chräftige Manne
Früener sind mir zäme ghocket und ganz im Vertraue
vo wem chönd mir Brichte, lobe oder i Pfanne haue?
Doch i däm Johr das grossi Schwiige
jede hät gmeint dä andri tägi schriibe!
Wie sölle ich do Brichte übers Turnergschee,
do blieb ich lieber die heime bim Tannenodletee!
Jetzt händ ihr doch en nival nagel neue Präsident,
händ er dä nöd igführt, dass er d'Regel nöd kännt?
Bi jedem Goof ziehn mehr d Ruete über s Füdle,
wänn er d Ufgobe nöd macht und nume tuet Grüble.
Nei, s nächshti Johr ohni Bricht und Geschenklisache,
chann dä Vorschtand dä Chlaus und Schmutzli mache!

Nur ein Vogel hät gsunge aber niemmert verhöhnt.
Mir guet zue gred und mich wäg däm Fopa versöhnt.
Drum sind mir jetzt bi eu und wönd doch churz Brichte
und villicht erfindet mir halt no es paar Gschichte.

I dä Mettle amne warme Mittwochobig im Sand
Wänd do zueluegsch gsehsch scho allerhand.

Wakeri Burschte und gschtandni Manne gumped und Seggle
Schlönd uf dä Ball, übers Netz und am Gegner in Egge.

Doch eine, mehrs chas doch fascht nöd begriffe,
läck wie dä spielt, das isch doch e riese Pfiffe.

Jede Ball won er wot passiere und schloh

Dä haut er is Netz, do laufsch fascht dervoh.

Doch ein Ball hätt er dänn bsunders guet troffe

und em en eigne Mitspieler direkt id Frässe gschosse.

Zwei Wuche isch drum eure armi Aktuar usser Gfecht.

Gäll Rolf wänd tra denksch wird's Dir hüt no schlecht!

Noch em Turne han ich verno, düend ihr nöd Pfusche
gönd i Garderobe , ziehnd eu ab und gönd go dusche.

Doch was isch dänn das für es fürchterlich Gschrei
di meischte gönd plötzlich ohni Dusche hei.

Dä Grund isch klar, d Hezig hät dä Geischt ufgeh
warum chönd ihr dänn kei chalts Wasser neh.

Nei, luega au do, ihr sind doch alli warmduscher

Chömed in Sterneberg mir händ s chalt Wasser verusse

S'Turndfescht findet die einte, seigi guet glunge
Si falled uf mit em neue schwarze Tenü in Pfunge.
Ein Männerturner wott bsunders gross uffalle,
er chaufft silbrigi Nockeschuh mit goldige Schnalle
ich weiss leider bis hüt nöd, was für en Rang er beleit,
ich han numme ghört, er heigi d'Nocke verleit.

Bim Chorbballwürfe isch es riesigs, mega Grööl.
Ich han wölle go luege, was dänn dä Lärme söll.
Ich kämpf mich durch d'Masse und gsehn dänn ufs Feld
Do schtobt eine im schwarze Tenü, aha, das isch dä Held.
Er lupft dä Ball, zielt konzentriert und tuet ihn werfe.
Scho schreit s'Publikum er tuet dä Chorb eifach nöd treffe.
Doch i dä Halle bim wöchentliche Trainings Spiel,
do isch er parat, spielt treffsicher und ganz agil.^^
Im andre Feld, schtobt eusen Präsi Willi, dä armi Tropf,
jede Schuss vo eusem Held trifft ihn an Chopf.
Drum Ruedi, ich gib dir en Rot für s nächsti Fescht
setz dä Willi in Chorb, wette, dass du dänn trefscht!

Dä Schmutzli chunnt hei, er isch ganz verwirrt,
er isch bi am Morge am vieri z'Neschwil umegierrt.
Es Glächter und Gschrei, luuti Mannestimme derzu.
Wo chunnt das her, er suecht, es loth ihm kei Rueh.
I m Freihof, bim Heiri er chans jetzt no nöd fasse,
heigs es paar Turner die trinket Schnaps us dä Tasse.
Das amne gwöhnliche Fritig „ik kann nit verstaahn“
Sind ächt das Turner us dä Gruppe Ponstan?
Au d'Polizeischtund isch für die nur zum Lache
Am Samschtig Morge chönd die halt usbache.

Jedes Johr, das dörf doch nöd fehle,
tuet dä Vorstand e Turner Reis uswähle.
Am Morge früeh mit Rucksack belade,
trifft mer sich bim Urs Thum vor em Lade.
Er riebt sich d Händ, hüt chönnti öppis goh,
vielleicht hät eine s Hemp no di heime loh.
Noch churzer Fahrt mit em bequeme Nüsslicar
Teilt sich in Wartau die grossi Turnerschar
Die wo usstieget gönd nöd jetz scho zum Bier,
die wandered direkt und züigig zum Churhus Alvier.
So hät jedi Gruppe Ihri eigni Vorstellig und Intresse,
die einte wönd wandered, die ander numme Fr... ischi Luft gnüsse.
Dä Andy lenkt dä Nüssliar mit sichere Händ
in Oberschan durch schмали Gasse und hochi Wänd.
Noch Ankunft, wird sofort noch ere Beiz umegschaue,
wo chann mer guet esse und wo no besser verdaue?
Schpöter chunnt die grossi Entscheidig und Frag,
möged mir ächt no i d Unterkunft laufe, bi Tag
Versuechig isch gross, es chönnt fascht nümme lange
mir fahred mit dä Seilbahn, chum bring no e Rundi Stange
Dä Obig im Churhus, do gits kei Pose
Es lauf gar nüt, s isch toti Hose.

An Sunntig morge, was für es Bild

Blaue Himmel, do wird packt wie wild.

Die erschti Gruppe macht sich früeh uf dä Marsch,

do luegt eine im Piji usem Zimmer und chratz sich am Arsch.

„Was isch dänn das für es grosse Gschrei“

Ich möchte gern usschlofe, ich bin doch nöd dihei.

Im lauf vom morge händ alli Grüppli s Churhus verloh

S gross Ziel isch bis em Mittag uf d Alp Palfries ufe z'cho.

Dä Max präsentiert dä neuschi Wanderschueh Trend

Er isch vor allem für die wo d'Fuessohle brennt,

au wänt a d Fuess frürsch, isch er nöd zum schlage,

schtosch eifach ine warme, frische Chueflade.

Mit brun brännte Grinde, zfriede und froh

Händ mir dänn d'Heimreis wieder ufgnoh.

Em alte Präsi no viel Aplaus und herzliche Dank

Ich hoffe, dö neui findet für di nöchscht Reis au dä Rank!

En Chegelobig wie jedes Johr schtobt aa,
jetzt dörf s Fraue li au mal mit em Maa usgaa.
Doch churz isch dä Schub, mer muess fascht pressiere,
dörf jede und jedi nume nün Chugle führe rüehre.
Dänn wird zämezelt usgwertet und rangiert.
Jede und jedi nimmts Wunder wär ächt jetzt führt?
E Ranglischt für d Manne und eini für d Fraue,
dä Präsi Willi tuet gnüsslich id Rundi schaue.
Drü Preise hät er i jeder Hand, er tuet sich fascht verrenke,
die tuet eu jedes Johr dä Metzger Cheller schenke!
Es paar Buureschüblig, e Specksite, en mordsgrosse Salami,
hoffentlich gwünn ich dä, das wär toll gottverdamm!
Die beschte drü wärdet mit den Gabe beschänkt,
alli Gwünner freued sich riesig über das Gschänk.
Nu die Fraue im 2. Rang lueget nochdenklich ad Wand,
sie hebet e schöni mageri Specksite i dä Hand.
Ihren Maa tuet sich jedoch ganz mächtig freue,
denn Sie tuet kei Fleisch, sondern nur Gmües chäue.
Drum liebe Max tuen s nöchsch mol ad Vegetarier danke,
chasch danne jo e doppleti Schwinsforelle schänke!

Vo dä ältere Abteilig im Männerturnverein
bleibt selte eine am Mittwochobig diheim.
Mer chann die gschtandne Manne nur Lobe,
das fangt aa mit dä Ornig i dä Garderobe.
Pünktlich am sechsi sind alli i dä Turnhalle
s'Fuschtballspiel tuet ne bsunders guet gfalle.
Neui Regle fürs Spiel muesch ifüehre mit viel Vestand,
susch schwätzt di die wakere Turner a d Wand.
Bim Fuschte gsesch unterschiedlichi Charaktere
Doch chömmed sie sich im Spiel selte i d'Quere.
Nur eine, ein drahtige Sprinter mitme guete Gschpür
dä holt für alli d'Chole us em Für.
Die einte spieled zwei Balle mit dä Hand
dänn stiegets us und hocket a d Wand.
Es git Turner die chömmed sogar vo enet am Bach,
der einti vo Schaffhuse, der ander vo Seuzach.
Au schön isch, dass ihr no s Gsellige düend pflege,
es hät jede drümol Geburtstag, das isch doch en Sege.
Nur Beize für euri vielsietige Ansprüch z finde,
die Chance wird in Wisli für eu immer chlinner.
Er wönd kei Rauch und kei luti Gäscht,
gueti Bedienig und zum Esse numme s'Bescht.
Ich gib eu en Rot, fanged sofort a sparre,
und chaufed eu en Camping-Charre.
Doch ein Bruch, dä vermiss ich bi dä Junge
Bi eu werde no immer schöni Lieder gsunge.

E Turnschtund gschtalte, das isch doch nöd schwär.
E chli Musig, es paar Uebige, alles daher.
So dänkt sich mäenge wo neu isch cho,
bevor er e Lektion bi Eu hät gnoh.
Er gschpürt dänn plötzlich a sim Ganze,
es brucht meh Muskle, als bim tanze.
So vielsitig wien ihr tüend sTuren gschtalte
bleibt jede wo mitmacht länger erhalte.
Herzlich Dank ihr liebe Turnstundeleiter,
wenn ich zu Eu chäm, würd ich au nümme breiter

Dä Obervorturner vo dä Chrabbelgruppe
Hät grossi Plän, das ghört mer munggle
Er wot dä grossi Schritt i Gmeindpolitik wage
Und sich als Präsi mit Dorfproblem umeschlage
Doch wänt das schaffsch, tue di nöd schiniere
Tue dänn mit Herz und nöd mit Parteiparole regiere!

So mini Herre, ich mis Buech jetzt bschlüsse
han ich nö d Woret gseit, chöne er uf mich schüsse,
der einzig wo zfride vom sterneberg isch glaufe
Er hät für Eu kei Gschänkli muese träge und chaufe
Alli die wo meined sie bechömmed vor mir e mildi Gab
Gönd zum Kassier, dä häa dä Geldseckel scho parad.

Mir zwei tüent i aller Ornig gute Nacht säge
und mir hoffed, eusri Wort seiged nöd vergebe,
mir wünsched eu allen no e gselligi Runde
viel Glück im neue Johr und tolli Turnschtunde.